

四庫全書

集部

欽定四庫全書

集部

漢魏六朝百三家集卷七十六

詳校官庶吉士_臣謝恭銘

主事銜_臣徐以坤覆勘

總校官檢討_臣何思鈞

校對官中書_臣陸湘

謄錄監生_臣王岑

欽定四庫全書

漢魏六朝百三家集卷七十六

齊王融集題詞

齊世祖禊宴芳林使王元長為曲水詩序有名
當世北使欽矚擬於相如封禪梁昭明登之文
選玄黃金石斐然盈篇即詞涉比偶而壯氣不
沒焜燿一時亦有繇也竟陵王宗子長賢元長
投許情分法門贊頌如塤如篪彼此之交謂以

淨照相得而愴楚入幕戎服災身蘭室梅崖豈
宜若是夫南齊王業太孫壞之孝武多男西昌
賊之設元長志遂竟陵當陽蕭氏福祚可世世
也謀敗獄死天即惡趙車之躁其不祐齊則久
矣人但見王郎年未三十心熱公輔并笑其斷
仗一舉債取瓦裂猶然成敗之見乎元長獄中
據答自云上甘露頌銀甕啟及三日詩序接虜
使語辭竭思稱揚得非誹謗夫穰侯相印不可

遽得終子雲賈長沙才則我自有的又曷不少
從容引分資成不朽哉

目錄

賦

風賦

桐樹賦應竟陵王教

疏

上北伐圖疏

議給虜書疏

請習校部曲疏

表

拜秘書丞謝表

為王儉讓國子祭酒表

又

獄中據答表

策問

永明九年策秀才文五首

永明十一年策秀才文五首

啟

求自試啟

法門頌啟

謝勅賜御裘等啟

謝勅賜米啟

謝竟陵王示法制啟

謝竟陵王示扇啟

謝竟陵王賜納裘啟

謝司徒賜紫鮓啟

謝武陵王賜弓啟

謝安陸王賜銀鉢啟

書

為竟陵王與隱士劉虬書

序

三月三日曲水詩序

頌

淨行頌三十一首

皇覺辯德篇頌

閑物歸信篇頌

滌除三業篇頌

修理六根篇頌

生老病死篇頌

尅責身心篇頌

檢覆三業篇頌

訶詰四大篇頌

出家順善篇頌

在家從惡篇頌

沈冥地獄篇頌

出家懷道篇頌

在家懷善篇頌

三界內苦篇頌

出三界外樂篇頌

斷絕疑惑篇頌

十種慚愧篇頌

極大慚愧篇頌

善友獎勸篇頌

戒法攝心篇頌

自慶畢故止新篇頌

大忍惡對篇頌

緣境無礙篇頌

一志努力篇頌

禮舍利寶塔篇頌

敬重正法篇頌

奉養僧田篇頌

勸請增進篇頌

隨喜萬善篇頌

迴向佛道篇頌

發願莊嚴篇頌

哀策文

皇太子哀策文

墓銘

豫章王墓銘

永嘉長公主墓銘

樂府

齊明王歌辭七首

明王曲

聖君曲

淶水曲

採菱曲

清楚引

長歌引

散曲

三婦艷詩

青青河畔草

同沈右率諸公賦鼓吹曲二首

巫山高

芳樹

臨高臺

望城行

法樂辭十二首

本起

靈瑞

下生

在宮

四遊

出國

得道

雙樹

賢衆

學徒

供具

福應

少年子

江臯曲

思公子

王孫遊

陽翟新聲

永明樂十首

奉和秋夜長

代五雜組

奉和兩頭織纖曲

詩

贈族叔衛軍

從武帝琅瑯城講武應詔

棲玄寺聽講畢遊邱園七韻應司徒教

雜體報范通直

別蕭諮議

寒晚敬和何徵君點

和王友德元古意二首

奉和竟陵王郡縣名

遊仙詩五首

春遊迴文詩

侍遊方山應詔

奉辭鎮西應教

餞謝文學離夜

和南海王殿下詠秋胡妻七首

琵琶

詠幔

藥名

星名

奉和月下

詠池上梨花

詠梧桐

詠女蘿

移席琴室應司徒教

抄衆書應司徒教

自君之出矣

擬古二首

四色詠

離合賦物為詠

雙聲詩

聯句

阻雪連句遙贈和

漢魏六朝百三集卷七十六目錄

欽定四庫全書

漢魏六朝百三家集卷七十六

明 張溥 輯

齊王融集

賦

風賦

奄今日采之既移忽兮羣景之將馳靡輕筠之碧葉汎
層松之翠枝總高羽而蕭瑟韻珠露之參差此烈士之

英風長寥亮其如斯

桐樹賦應竟陵王教

梧桐生矣於邸岫之層隈儀龍門而插幹佇鳳羽以抽
枝從楚宮而留稱藉溜館以翻聲直不繩而特秀圓匪
規而天成同歲草以萎暮共辰物而滋榮豈遠心以自
外寧有志於孤貞

疏

上北伐圖疏

臣聞情愴自中事符則感象構於始機動斯彰莊敬之
道可宗會揖讓其彌肅勇烈之士足貴應輶鐸以增思
肇植生民厥詳既緬降及興運維道有徵莫不有所因
循而升皇業者也若夫膏腴既稱天乙知五方之富皮
幣已列帝劉測四海之尊異封禪之文則升中之典攸
邇歎輿地之圖乃席捲之庸是立伏惟陛下窮神盡聖
總極居中偶化兩儀均明二曜拯玄綱於頽絕反至道
於清淳可謂區宇儀刑齊民先覺者也臣亦遭逢生此

嘉運鑿飲畊食自幸唐年而識用昏霾經術疎淺將邁
且軸豈蕨與薇皇鑒燭幽天高聽下賞片言之或善矜
一物之失時湔拂塵蒙霑飾光價拔足草廬廁身朝序
復得拜賀歲時瞻望日月於臣心願會已畢矣但千祀
一逢休明難再思策鉛鴛樂陳涓壻竊習戰陳攻守之
術農桑牧藝之書申商韓墨之權伊周孔孟之道常願
待詔朱闕俯對青蒲請閒宴之私談當世之務位賤人
微徒深傾款方今九服清怡三靈和晏木有附枝輪無

異轍東鞮獻舞南籥傳歌羗楚踰山秦屠越海舌象翫
委體之勤輜譯厭瞻巡之數固將開桂林於鳳山創金
城於西守而蠢爾獫狁敢讎大邦假息關河竊命函谷
淪故京之爽塏變舊邑而荒涼息反坫之儒衣久伊川
之被髮北地殘民東都遺老莫不茹泣吞悲傾耳戴目
翹心仁政延首王風若試馳咫尺之書具甄戎旅之卒
徇其墜城納其降虜可弗勞弦鏃無待干戈真皇王之
兵征而不戰者也臣乞以執殳先邁武道中原澄瀚渚

之恒流掃狼山之積霧係單于之頸屈左賢之膝習呼
韓之舊儀拜鑾輿之巡幸然後天移雲動勒封岱宗咸
五登三追蹤七十百神肅警萬國具僚璿弁星離玉帛
雲聚集三燭於蘭席聆萬歲之禎聲豈不盛哉豈不韙
哉昔桓公志在伐莒郭牙審其幽趣魏后心存去漢德
祖究其深言臣愚昧忖誠不足以知微然伏揆聖心規
模宏遠既圖載其事必克就其功臣不勝歡喜

議給虜書疏

虜使遣求書朝議欲
不許融上疏請許之

臣側聞僉議疑給虜書如臣愚情竊有未喻夫虜人面
獸心狼猛蜂毒暴悖天經虧違地義逋竄燭幽去來幽
朔綿周漢而不悛厯晉宋其踰梗豈有愛敬仁智恭讓
廉修慙犬馬之馴心同鷹虎之反目設橐秣有儲筋竿
足用必以草竊闕燧寇擾邊疆寧容款塞卑辭承衣請
朔陛下務存遵養不時侮亡許其膜拜之誠納裘之賁
況復願同文軌儻見欸遣思奉聲教方致猜拒將使舊

邑遺逸未知所寘衰胡餘嘒或能自推一令蔓草難鉏
涓流泛酌豈直疥癢輕痾容為心腹重患抑孫武之言
也困則數罰窘則多賞先暴而後畏其衆者虜之謂乎
前中原士庶雖淪懾殊俗至於婚葬之晨猶巾禱為禮
而禁令苛刻動加誅輟於時獠粥初遷犬羊尚結即心
徒怨困懼成逃自其將卒奔離資峙銷闕北畏勅蠕西
逼南胡民背如崩勢絕防斷於是曲從物情偽竊章服
厯年將絕隱蔽無聞既南向而泣者日夜以覲北顧而

辭者江淮相屬凶謀歲窘淺慮無方於是稽顙郊門問
禮求樂若來之以文德賜之以副書漢家軌儀重臨畿
輔司隸傳節復入關河無待八百之師不期十萬之衆
固且提漿佇俟揮戈願倒三秦大同六漠一統又虜前
後奉使不專漢人必介以匈奴備諸覘獲且設官分職
彌見其情抑退舊苗扶任種戚師保則后族馮晉國總
錄則邾姓直勒渴侯台鼎則丘顏苟仁端執政則目凌
鉗耳至於東都羽儀西京簪帶崔孝伯程虞蚪久在著

作李元和郭季祐上于中書李思沖飾虜清官游明根
泛居顯職今經典遠被詩史北流馮李之徒必欲遵尚
直勒等類居致乖阻何則匈奴以氈騎為帷床馳射為
糗糧冠方帽則犯沙陵雪服左袵則風驟鳥逝若衣以
朱裳戴以玄冕節其指讓教以翔趨必同艱桎梏等懼
冰淵婆娑蹶躓困而不能前已及夫春草水生阻散馬
之適秋風木落絕驅禽之歡息沸屑於桑墟別醞乳於
冀俗聽韶雅如隴贖臨方丈若爰居馮李之徒固得志

矣虜之凶族其如病何於是風土之思深愎戾之情動
拂衣者連裾抽鋒者比鏃部落爭於下酋渠危於上我
一舉而兼吞下莊之勢必也且棘寶薦虞晉疆彌盛大
鍾出智宿氏以亡帝略遠孚無思不服鑾光幸岱匪暮
斯朝臣請收籍伊瀝茲書復掌猶取之內府藏之外籙
於理有愜即事何損若狂言足採請決敕施行

請習校部曲疏

臣每覽史傳見憂國忘家捐生報德者未嘗不撫卷歎

息以為今古共情也然或以片言微感一食小惠參國士之眄同布素之遊耳豈有如臣獨拔無聞之伍過超非分之位名器雙假榮祿兩升而宴安是罷之晨優游盱食之日所以敢布丹愚仰聞宸聽今議者或以西夏為念臣竊謂之不爾其故何哉陛下聖明羣臣悉力順以制逆上而御下指開賞黜之言微示生死之路方域之人皆相為敵既兵威遠臨人不自保雖窮鳥必咏固等命於梁鵲困獸斯驚終並懸於厨鹿凱師勞飲固不

待晨臣之寸心獨有微願自獫狁薦食荒侮伊瀝天道
禍淫危亡日至母后內難兵力外虛謠言物情屬當今
會若藉巫漢之歸師騁士卒之餘憤取函谷如反掌陵
闕塞若摧枯但士非素蓄無以即用不教民戰是實棄
之特希私集部曲豫加習校若蒙垂許乞隸監省拘食
人身權備石頭防衛之數臣少重名節早習軍旅若試
而無績伏受面欺之誅用且有功仰訓知人之哲

表

拜秘書丞謝表

臣聞升離戒晨陰牆不照其景庸雲停夕幽草或漏其
津至如明兼就日澤深行雨不有聖德誰或其然所以
欽至道而出青臯拾布衣而望朱闕懷祿仕在代耕期
榮不謀入用豈悟特擢之例事均延祖置左之恩任光
元幹踰溢情涯普燭身表畏趨車而必讓誠濡翼之願
辭既聖主謂其可施故愚臣默思自勉

為王儉讓國子祭酒表

竊以庠均義重振古所崇資師道尊有來攸尚匪曰蘭
芷疇變入室之情不自朱藍何遷素絲之質況臣仁慙
富侶德謝潤身識陋令經器非匣重何以昇墜道於殊
年反斯文於遙日將使良璣修竹無增瑩羽敬遜務時
遂騫星歲

又

臣聞修瓦方湛弱露露而取覆懸衡紀正輕塵委而必
移況臣才非應俗用乖知治取其集冰飲水旌懸輪驚

方臣之念未足言矣

獄中據答表

囚實頑蔽觸行多讐但夙忝門素得奉教君子爰自總
髮迄將立年州閭鄉黨見許愚慎朝廷衣冠謂無豐咎
過蒙大行皇帝獎育之恩又荷文皇帝識擢之重司徒
公賜預士林安陸王曲垂眄接既身被國慈必欲以死
自効前後陳伐虜之計亦仰簡先朝令段犬羊乍擾紀
僧真奉宣先敕賜語北邊動靜令囚草撰符詔于時即

因啟聞希侍鑒興及司徒宣敕招募同例非一實以戎
事不小不敢承教續蒙軍號賜使招集銜敕而行非敢
虛扇且格取亡叛不限傖楚狡弄聲勢應有形迹專行
權利又無贓賄反覆脣齒之間未審悉與誰言傾動頗
舌之內不容都無彼此但聖主膺教實所沐浴自上甘
露頌及銀甕啟三日詩序接虜使語辭竭思稱揚得非
誹謗且王公百司唯賢是與高下之敬等秩有差不敢
踰濫豈應訛毀因才分本劣謬被策用悚忤之情夙宵

兢惕未嘗誇示里閭彰曝遠邇自循自省並愧流言良
由緣淺寡虞致貽罵謗伏惟明皇臨宇普天蒙澤戊寅
赦恩輕重必有首日曠期始蒙旬日一介罪身獨嬰憲
劾若事實有徵爰對有在九死之日無恨泉壤

策問

永明九年策秀才文五首

問秀才高第明經朕聞神靈文思之君聰明聖德之后
體道而不居見善如不及是以崆峒有順風之請華封

致乘雲之拜或揚旌求士或設簾待賢用能數化一時
餘烈千古朕夤奉天命恭惟永圖審聽高居載懷祇懼
雖言事必史而象闕未箴寤寐嘉猷延佇忠實子大夫
選名升學利用賓王懋陳三道之要以光四科之首鹽
梅之和屬有望焉

又問昔周宣脩千畝之禮號公納諫漢文缺三推之義
賈生直言良以食為民天農為政本金湯非粟而不守
水旱有待而無遷朕式照前經寶茲稼穡祥正而青旗

肅事土膏而朱紘戒典將使杏花萼葉耕獲不愆清畊
冷風述遵無廢而釋耒佩牛相沿莫反蕪貧擅富浸以
為俗若爰井開制懼驚擾愚民烏鹵可腴恐時無史白
興廢之術天陳厥謀

又問議獄緩死大易深規敬法卹刑虞書茂典自氓俗
澆弛法令滋彰肺石少不寃之民棘林多夜哭之鬼朕
所以明發動容晨食興慮傷秋荼之密網惻夏日之嚴
威永念畫冠緬追刑厝徒以百鍰輕科反行季葉四支

重罰爰創前古訪遊禽於絕澗作霸秦基歌雞鳴於闕
下稱仁漢牘二途如爽即用兼通昌言所安朕將親覽
又問聚人曰財次政曰貨泉流表其不匱懋遷通其有
無既龜貝積寢緡纒專用世代茲多銷漏參倍下貧無
兼辰之業中產闕洊歲之貲惟瘼卹隱無捨矜歎上帝
溥臨賜朕休寶命卽斜之谷開而出銅且有後命事茲鎔
範充都內之金紹園府之職但赤仄深巧學之患榆莢
難輕重之權開塞所宜悉心以對

又問治厯明時昭遷革之運改憲勅法審刑德之原分
命顯於唐官文條炳於鄒說及岨夷廢職昧谷虧方漢
秉素祗之徵魏稱黃星之驗紛爭空軫疑論無歸朕獲
纂洪基思弘至道庶令日月休徵風雨玉燭克明之旨
弗遠欽若之義復還於子大夫何如哉其驪翰改色寅
丑殊建別白書之

永明十一年策秀才文五首

問秀才朕秉籙御天握樞臨極五辰空撫九序未歌至

於思政明臺訪道宣室若墜之惻每勤如傷之念恒軫
故恤貧緩賦省徭慎獄幸四境無虞三秋式稔而多黍
多稌不興兩穗之謠無褐無衣必盈七月之歎豈布政
未優將疲民難業登爾於朝是屬宏議罔弗同心以匡
厥辟

又問惟王建國惟典命官上叶星象下符川嶽必待天
爵具修人紀咸事然後沿才授職揆務分司是以五正
置於朱宣下民不忒九工開於黃序庶績其凝周官三

百漢位兼倍歷茲以降游惰實繁若閒冗畢棄則橫議無已冕笏不澄則坐談彌積何則可修善詳其對

又問昔者賢牧分陝良守共治下邑必樹其風一鄉可
以為績至有旦撫鳴琴日置醇酒文而無害嚴而不殘
故能出人於阡危之域躋俗於仁壽之地是以賈誼言
天下之有惡吏之罪也頃深汰珪符妙簡銅墨而春雉
未馴秋螭不散入在朕前湊其智略出連城守闕爾無
聞豈薪樵之道未弘為網羅之目尚簡悉意正辭無侵

執事

又問朕聞上智利民不述於禮大賢彊國罔圖惟舊豈
非療飢不期於鼎食拯溺無待於規行是以三王異道
而共昌五霸殊風而並烈今農戰不修文儒是競棄本
徇末厥弊滋多昔宋臣以禮樂為殘賊漢主比文章於
鄭衛豈欲非聖無法將以既道而權今欲專士女於耕
桑習鄉閭以弓騎五都復而事庠序四民富而歸文學
其道奚若爾無面從

又問自晉氏不綱關河蕩析宋人失馭淮汴崩離朕思
念舊民永言攸濟故選將開邊勞來安集加以納款通
和布德修禮歌皇華而遣使賦膏雨而懷賓所以闕洛
動南望之懷獯夷遽北歸之念夫危葉畏風驚禽易落
無待干戈聊用辭辯片言而求三輔一說而定五州斯
路何階人誰或可進謀誦志以沃朕心

啟

求自試啟

臣聞春庚秋蟀集候相悲露木風榮臨年共悅夫惟動
植且或有心況在生靈而能無感臣自奉望宮闕沐浴
恩私拔迹庸虛參名盛列纓劍紫複趨步丹墀歲時歸
來誇榮邑里然無勤而官昔賢曾議不任而祿有識必
譏臣所用慷慨憤懣不遑自安誠以深恩鮮報聖主難
逢蒲柳先秋光陰不待貪及明時展悉愚効以酬陛下
不世之仁若微誠獲信短才見序文武更法惟所施用
夫君道含弘臣術無隱翁歸乃居中自見克國曰莫若

老臣竊景前修敢蹈輕節以冒不媒之鄙式罄奉公之誠抑又唐堯在上不參二八管夷吾恥之臣亦恥之願陛下裁覽

法門頌啟

伏以迦文啟聖道冠百靈常住置言理高萬乘神儀挺發非望雲就日所追睿識獨尊豈生明弱言能企鹿苑金輪弘汲引以濟俗鶴林雙樹顯究竟以開氓惜乎祇園滅影驚岳淪光微辭既遠大義如綴自不宣游十地

擁按九區豈有導覺水之塞源拯法雲於落仞明公覽
四諦之必空悟三業之暫有應務屈已則仁兼旦夷隨
方申道則慧一淨名驅率土於福林入蒼黔於正術

謝勅賜御裘等啟

雲衣降授仙裾曲委榮振素里澤駭蓬心昔漢帝解裘
不獨前寵曹王褫帶復降今恩

謝勅賜米啟

臣無王陽之術計然之智不能負粟百里分地一廛上

虧溫養自取飢切豈悟外恩橫集天私妄委

謝竟陵王示法制啟

翔慧燭於昏塗灑法水於塵路至夫澄心洗累之規莊
情束影之制解網出界之訓滅惑淨照之旨固以行首
霜威字端風厲信可以糟泮五書黷氛百氏升罩聃周
筭竿尼旦所謂窺七澤而狹潢汙登太山而小天下

謝竟陵王示扇啟

竊以六翮風流五明氣重若比圓綃有兼玩實輕踰雪

羽潔竝霜文子淑賞其如規班姬儷之明月豈直魏王
九華漢臣百綺沉復動製聖衷垂言炯戒載摹聽眎式
範樞機

謝竟陵王賜納裘啟

降飾自尊垂榮及賤玄玉不純曾波奪采南陸方永北
風日壯無衣無褐發念聖衷而挾纊之問每流解裘之
賜偏委

謝司徒賜紫鮮啟

東越水羞實罄乘時之美南荆任土方挹鮓魚之最

謝武陵王賜弓啟

殿下搗藻蕙樓暢藝蘭苑敷積玉於風筵疊連珠於月
的兔園掩秀鄴水慚奇融揖讓未工濫陪升飲之賞操
弧反正繆奉招賢之錫文韜鏤景逸幹捎雲玩溢百齡
佩流千載

謝安陸王賜銀鉢啟

素金之貴有訪仙經鐫刻可奇見符神鼎撤膳器於珍

羞之席降寶玩於簞瓢之門

書

為竟陵王與隱士劉虬書

玉燭登年金商在律炎涼始貿動靜惟安勤味道腴幸
遵雅尚豈不樂哉僕誠幸甚百姓一心衆生不疾比屋
可封將又何求但良書獨擁善談無析願言之子實癖
我心所以不遠千里尺書道意自淳清既辨澆漓代襲
隱顯之術參差默語之途紛互或飾智以警愚或激情

以悟俗或穢已以閤通或謬歌以明道屠牛駟馬未足
磷其堅佯狂如愚豈能緇其白官楚蕃魏人外之氣逾
邈入漢游梁區中之韻彌少及推其輕重品其得失則
淵懷洞賞寧或符之僕夙養閒襟長慕出槩迹塵珪組
心逸江湖未面自親聞風如舊而迴駕之念徒軫式閤
之禮無階固已佇軸深衷傾筐遐路者矣君矯然獨遠
確乎難拔素志與白雲同悠高情與青松共爽宜習質
文緇林枯而重葦昭辨空有連河壅而復滔所謂忘言

之人可論天人之際豈能鳳舉鶴翻有心儀羣高踰愛
海比策禪衢沾濠射之冥游屈祇鷺之法侶闡三乘於
窮子發二諦於困蒙有是因也何其暢歟今皇風具穆
至道弘被四海不溢五嶽無塵膠序肇修經法敷廣人
賤璣璫家習禮讓樵蘇必時郊林全鬱量網有節鱗羽
偕翔至於層山絕澗還帶畿畎膏田沃野亘望廡廛信
可以招往隱淪栖集勝寄故文舉築室治城之阿次宗
植援西山之趾葛洪考槃於海岫釋逵肥遁於鍾幽每

踐其遺蹤輒深九原之歎若高步可遷復何懷乎四子
昔宣尼之見伯雪師利之往維摩豈不知相忘之道哉
諒有以也未叙之間為道自愛一二令凌琚之口具

序

三月三日曲水詩序

臣聞出豫為象鈞天之樂張焉時乘既位御氣之駕翔
焉是以得一奉宸逍遙襄城之域體元則大悵望姑射
之阿然宵眇寂寥其獨適者已至如夏后兩龍載驅璿

臺之上穆滿八駿如舞瑤水之陰亦有饗云固不與萬
民共也我大齊之握機創厯誕命建家接禮貳宮考庸
太室幽明獻期雷風通饗昭華之珍既徙延喜之玉攸
歸革宋受天保生萬國度邑靜鹿丘之歎遷鼎息大垆
之慙紹清和於帝猷聯顯懿於王表駿發開其遠祥定
爾固其洪業皇帝體膺上聖運鍾下武冠五行之秀氣
邁三代之英風昭章雲漢暉麗日月牢籠天地彈壓山
川設神理以景俗敷文化以柔遠澤普祀而無私法含

弘而不殺猶且具明廢寢晷晷忘餐念負重於春冰懷
御奔於秋駕可謂巍巍弗與蕩蕩誰名秉靈圖而非秦
涉孟門其何險儲后睿哲在躬妙善居質內積和順外
發英華斧藻至德琢磨令範言炳丹青道潤金璧出龍
樓而問豎入虎闌而齒胄愛敬盡於一人光耀究於四
海若夫族茂麟趾宗固磐石跨躡昌姬蹈軼炎漢元宰
比肩於尚父中鉉繼踵乎周南分陝流勿翦之歡來仕
允克施之譽莫不如珪如璋令聞令望朱芾斯皇室家

君王者也本枝之盛如此稽古之政如彼用能免羣生
於湯火納百姓於休和草萊樂業守屏稱事引鏡皆明
目臨池無洗耳沈寔之怨既缺邁軸之疾已消興廉舉
孝歲時於外府署行議年日夕於中甸協律總章之司
序倫正俗崇文成均之職導德齊禮挈壺宣夜辨氣朔
於靈臺書笏珥彤紀言事於仙室褰帷斷裳危冠空履
之吏影搖武猛扛鼎揭旗之士勤恤民隱糾逖王惡射
集隼於高墉繖大風於長隧不仁者遠惟道斯行讒莠

茂聞攘爭掩息稀鳴桴於砥路鞠茂草於園扉耆年闕
市井之游稚齒豐車馬之好宮隣昭泰荒憬清夷侮食
來王左言入侍離身反踵之君髻首貫胸之長屈膝厥
角請受纓縻文鉞碧帟之琛竒幹善芳之賦紈牛露犬
之玩乘黃茲白之駟盈衍儲邸充牣郊虞匭牘相尋鞞
譯無曠一尉候於西東合車書於南北暢輶埋麟麟之
轍綏旌卷悠悠之旆四方無拂五戎不距偃革辭軒銷
金罷刃天瑞降地符升澤馬來噐車出紫脫華朱英秀

佞枝植厯草滋雲潤星暉風揚月至江海呈象龜龍載
文方握河沈璧封山紀石邁三五而不追踐八九之遙
迹功既成矣世既貞矣信可以優游暇豫作樂崇德者
歟于時青鳥司開條風發歲粵上斯已惟暮之春同律
克和樹草自樂襍飲之日在茲風舞之情咸蕩去肅表
乎時訓行慶動於天矚載懷平圃乃睠芳林芳林園者
福地奧區之湊丹陵若水之舊殷殷均乎姚澤撫撫尚
於周原狹豐邑之未宏陋譙居之猶褊求中和而經處

揆景緯以裁基飛觀神行虛檐雲構離房乍設層樓間
起負朝陽而抗殿跨靈沼而浮榮鏡文虹於綺疏浸蘭
泉於玉砌幽幽叢薄秩秩斯干曲拂遄迴潺湲徑復新
萍泛沚華桐發岫雜天采於柔荑亂嚶聲於絳羽禁軒
承幸清宮俟宴緹帷宿置帘幕宵懸旣而滅宿澄霞登
光辨色式道執父展軫效駕徐鑾警節明鐘暢音七萃
連鑣九旂齊軌建旗拂蜺揚葭振木魚甲煙聚貝胄星
羅重英曲瑤之飾絕景追風之騎昭灼甄部駟駿函列

虎視龍超雷駭電逝轟轟隱隱紛紛軫軫羌難得而稱
計爾乃迴輿駐罕嶽鎮淵停睥容有穆賓儀式序授几
肆筵因流波而成次蕙肴芳醴任激水而推移蓀侑陳
階金匏在席戚奏翹舞籥動邠詩召鳴鳥於弇州追伶
倫於嶰谷發參差於王子傳妙靡於帝江清歌有闋羽
觴無筭上陳景福之賜下獻南山之壽信凱讌之在藻
知和樂於食草桑榆之陰不居草露之滋方渥有詔曰
今日嘉會咸可賦詩凡四十有五人其辭云爾

頌

淨行頌三十一首

皇覺辨德篇頌

紫實昧朱狂斯溫哲外逕揚鑣分源競柰麗景或幽澄
舒每缺水激波生煙深火滅情端徒總理向空徹不有
明心誰驅聖轍

開物歸信篇頌

生浮命外識罔情違業雲結影慧日潛暉逶迤修道極

夜無歸登山小魯泛海難沂參珉見壁辨礫知璣迷其
未遠匪正何依

滌除三業篇頌

樂由生滅患以身全業資意造事假言詮利名畢倚榮
辱茲纏燕驥匪躡周錯徒鐫惑端風緒愛境旌懸不勤
一至何階四禪

修理六根篇頌

傾都麗佳繞梁之曲肥馬輕裘蕙有芳醪晦黑滋生昏

巖競欲貌蕩魂浮身甘意觸靈龜攝根晴葵衛足蟲草
或虞人如不勗

生老病死篇頌

穠華易遷繁蕉不實星髮鮐肌鄰光愒日二豎潛言十
巫空衛生之往矣高松蕭瑟即化翻靈從緣墜質噬臍
有譏嗟然何汨

尅責身心篇頌

瞻彼進德莫敢或遑顧咨小智徒以大康豈無通術跋

此榛荒雖有重離迹照螢光循情內負撫事外傷層羅
一舉空念高翔

檢覆三業篇頌

渾風緬沒旅俗膠加競文內疾誰覲心瑕再惟情反三
省身華貴危窮濫貧懾豪奢還迴六蔽紛綸七邪不圖
厥始逸馬難且

訶詰四大篇頌

迅矣百齡綿茲六入出沒昏疑興居愛習矻矻子求營

營爾給匪德日歸惟殃斯集貪人敗類無厭自及昭回
不希玄壚何泣

出家順善篇頌

澡身浴德晦迹埋名將安寶地誰留化城道場曠謚禪
逕閒清風瓢弗響震瞰徒驚嘯傲馬慮脫落何營長捐
有結永冥無生

在家從惡篇頌

石磨則磷玉生雖堅維居必徙豈曰能賢冰開春日蘭

敗秋年教隨類反習乃情選命符三漏生偕十纏茲焉
遂往憂畏方延

沈冥地獄篇頌

冥津殊復曉高聽亦能卑陰牆雖兩密幽夜有四知炎
山翻烈火冰澗市寒漸羅城振雲幕鋒樹鬱霜枝茹荼
非云苦集木豈稱危求仁曾已得長歎欲何為

出家懷道篇頌

韞石諒非真飾瓶信為假竊服臯門上濫吹溜軒下鳳

祀徒驚心騶交終好野實相豈或照浮雲未能捨迹殊
冠冕客事繫馳驅者已矣歇鄭聲無然亂周雅

在家懷善篇頌

處塵貴不染被褐重懷珠美玉曜幽石曾蘭挺叢芻四
氏不為侶三界豈能渝諒茲親愛染寧以財利拘煩流
捨智寶榛路坦夷途萬物竟何匹烈火樹紅笑

三界內苦篇頌

心怨動紛遶情怡輒遷互歡愛一離遠傷憂坐衰暮連

幌結清陰高臺起風露腐毒緣芳旨天伐實修嫫慾網
必虧生繁且或全免眇眇夜何期悠悠終肯悟

出三界外樂篇頌

端襟測煩海矯步寫埃氛三受猶絕雨八苦若浮雲輸
心仰圓極罄質委方墳朝遊淨國侶暮集靈山羣燈祇
開遠照香字薦嘉薰俛首睇人俗信矣靜為君

斷絕疑惑篇頌

生塗非一理識緒固饒津徒駭東陵富空嗟北郭貧國

生曾已戾顏氏信為仁逢尤昭往業習善會茲身勤憂
永夷泰晏安終苦辛令名且云重豈若樹良因

十種慚愧篇頌

神膏施惟重玄酒恩未隆明璣隋水上潤玉藍田中稟
天性所極資敬道攸崇羽毛共以勢輪軌相為通報德
愴前雅酬言愛餘風遵途每多舛顧省能無忤

極大慚愧篇頌

冬狐理豐毳春蠶緒輕絲形骸翻為阻心識還自欺華

容羈卅日生平少年時驅車追俠客酌酒弄妖姬但念
目前好安知身後悲惕然一以愧永與情愛辭

善友獎勸篇頌

蘭室改蓬心梅崖變伊草丹青有必渝絲轢豈常皓曲
輾且繩直詭木遂雕藻一簣或成山百里倦中道隆漢
乃王臣失楚信元保勉矣德不孤至言匪虛造

戒法攝心篇頌

金山嚴寶仞瓊峴烈瑤莢牆狐議不窟檐鷗豈能棲淨

花莊思序慧沼盟身倪六羣倘未一七衆固恒齊端儀
有直景正道無傾蹊維宮超以悟襄野竟何迷

自慶畢故止新篇頌

春非我春秋非秋一經長夜每悠悠陶形練氣佳元造
啟蒙夷阻出重幽榮公三樂非為曠箕子五福豈能求
靈姿妙境往難集微言至道此云修年逢生幸曾以慶
盈愆貳過倘知憂畢故斷新別苦海希賢庶善憑智流
大忍惡對篇頌

春山之下玉抵禽漢水之陽璧千金清業神居德非重
潔已愚侶道已深愛憎喜怒生而習榮華芳旨世所欽
鴻才巨力萬夫敵誰肯制此方寸心逸驥狂兕獷不御
繁羈密桺儻能禁遣情遺事復何想寂然無待恣幽尋

緣境無礙篇頌

恍象惚物終不名龍舉鸞集竟誰辨絕智亡身孰為礙
韜名戢曜故能顯匪日匪月灼以懸安飛安翔虛而踐
壁石無間恣出沒水火有性任舒卷敷教應俗驚泉流

現迹依方迅風轉大哉超世莫與羣希轅慕舜宜自勉
一志努力篇頌

豫北二山尚有移河中一洲亦可為精誠必至霜塵下
意氣所感金石離有子刺掌修名立王生擢髮美譽垂
自來勤心少騫隆何不努力出憂危勝幡法鼓縈且擊
智師道衆紛以馳有常無我儼既列無明有縛孰能窺
禮舍利寶塔篇頌

越人鑄金誠有思魏后粧木亦云悲中賢小節猶可戀

去聖彌遠情彌滋祇樹蕭條多宿楚王宮寂寞渺遺基
設像居室若有望間儀駐景暖如之連卿共日獨先後
道悠命乖將無時傾懷結想惻以慕乖靈寫照拂塵疑

敬重正法篇頌

出不自戶將何由行不以法欲焉修之燕入楚待駿足
陵河越海寄輕舟仁言為利壯已博聖道弘濟邈難求
通明洞燭煥曾景深凝廣潤湛淵流翼善開賢敷教義
照蒙啟惑滌煩憂功成弗有名弗居淡然無執與化遊

奉養僧田篇頌

五玉已潤談而信八桂雖芳風乃掃妙理至言唯聖寶
不自伊人孰弘道照空觀法識遷流撫俗瞻光厭生老
絕滅情嗜斷懼怡縱落豪華棄雕藻親愛倏忽信風煙
財利悠悠若塵草測以龍雲豈曰高濯足江漢更慚皓
勸請增進篇頌

俟河之清逢聖朝靈智俯接一其遙白日馳光不流照
葵藿微志徒傾翹遍盈空有盡三界綿塞宇宙罄八遼

德光業速升至覺寂寞常住獨能超煎灼欲火思雲露
沈汨使水望舟橋弘慈廣度昔有誓法輪道御且徐驅

隨喜萬善篇頌

聞善若已燭良書見賢思齊美通誥感幽動地孝有誠
殞首流腸忠為操振禮摛文弘憲則機謀颺勇靜姦暴
明白入素志沖聞高論窮微契神奧捐軀濟物不邀名
輕財貴義豈期報百行萬善紛塗軌求誠罄想畢歡蹈

迴向佛道篇頌

悠悠九土各異形擾擾四俗非一情驅車秣馬徇世業
市交鬻義街虛名三墨紛紛殊不會七儒委鬱曾未并
吉凶拘忌迺數術取與離合實縱橫朝日夕月竟何取
投巖赴火空捐生咄嗟失道爾迴駕沔彼流水趣東瀛

發願莊嚴篇頌

心所期兮彼之岸何事浮俗久淹迨照慧日兮駕法雲
騰危城兮出塵館芳珠璣兮聞歲時寶樹颺兮警昏旦
清露漙甘永以挹喜園流采常為玩無待殷鼎方丈羞

安用秦箏纖指彈勒誠款願長不渝習苦塵勞從此捍
哀策文

皇太子哀策文

繡幕啟塗銅池從殯葆鐸既行枚綽且引皇帝痛染盛
之闕奉哀七鬯之有亡憫含嗟乎崇正顧掩歎於承光
式睠元良永懷人寶俾茲史策載餘風道其辭曰

居辰北極在日重離誕惟妙善克自生知資神為契合
聖如規地維缺位月紀誓期哀纏晦朔燧改歲時饘粥

不溢薑桂無滋俛終心禮昌我帝基思皇下武纘戎上
德將叶人神永貽家國用稽嗣典實弘儲則庸器改物
徽號崇名往辭綠蓋來馭朱纓旂旗旖旎鸞轟聲明守
器宣華訪安永福上漏驂軒初晨戒服慶色伊滿寅儀
載肅至誠莫感遐福空辭氛程月志祲動年司素媛犯
列青雲失滋中楹軫夢當戶陳詩楚藥毀方秦豎反轍
高議虛演奇文徒說遠賓上靈長違昭世痛結宸慈哀
震華棣嗚呼哀哉軒帷高寂庭帳深陰鶴闌晝掩鳧燈

夜沈仍襲未改客饌如臨曖微儀而可慕標嗣子之純
心嗚呼哀哉韋弁告期麻衣請日辨域展圖揚龜獻吉
文物充階具條在側總葭挽之哀淒視風煙之騷瑟嗚
呼哀哉飾麾輅而南指轉旌羽而北徂車結軫於雕轂
馬緩節於金蘇寄靈心於萬象增戀戀於國都嗚呼哀
哉光徙靡而欲沈山荒涼而遂晚城闕緬而何期平原
忽而超遠情有望而弗追顧如疑於將反嗚呼哀哉

墓銘

豫章王墓銘

領袖傾淪人網弛沒半嶽摧峯中河墜月眷然曉隧如
何夜臺鯨驂枕慕葆吹徘徊千秋萬祀顧有餘哀

永嘉長公主墓銘

作儀邦媛取儷漢妃相金陋質穠李慚輝肅穆婦容靜
恭女德顧史求箴披圖問則慶善郁夷與仁冥默宵燧
亡明曉挽已聲松門嚴濶泉帳寒清悠哉白日鬱彼佳
城

樂府

齊明王歌辭七首

應司徒教作
以下五言

明王曲

明王日月照至樂天地和幸息雲門吹復歌咸池歌桂
序金匏轉瑤軒絲石羅朱騏步躑躅玄鶴舞蹉跎露凝
嘉草秀煙度醴泉波皇基方萬祀齊民樂如何

聖君曲

聖君應昌厯景祚啟休期龍樓神睿道兔園仁義基海

蕩萬川集山崖百草滋盤苗成萃止渝棘異來思清明
動離軫威惠被殊辭大哉君為后何羨唐虞時

淶水曲

湛露改寒司交鶯變春旭瓊樹落晨紅瑤塘水初淶日
霽沙溼明風泉動華矚遵渚泛蘭觴乘漪弄清曲斗酒
千金輕寸陰百年促何用盡歡娛王度式如玉

採菱曲

炎光銷玉殿涼風吹鳳樓雕輜一作青輅徭平隰朱櫂泊安

流金華妝翠羽鷁首畫飛

一作龍

舟荊姬採菱曲越女江

南謳騰聲翻葉靜散響谷雲浮良時時一遇佳人難再求

清楚引

平原數千里飛觀鬱岌岌清月同將曙皓露零中宵轉
葉度沙海別羽自冰遼四面通寒色左右竟嚴飈崢澔
多榛梗京索久塵苗逝將憑神武奮劍盪遺妖

長歌引

周雅聽休明齊德觀升平紫煙四時合黃河萬里清翠
柳蔭通街朱闕臨高城方轂雷塵起接袖風雲生酣笑
爭日夕絲管互逢迎徂年無促慮長歌有餘聲

散曲

金枝湛明燎繡幕裂芳然層閨橫綠綺曠席緬珠躔楚
調廣陵散瑟柱秋風弦輕裙中山麗長袖邯鄲妍徐歌
駐行景迅節渙浮煙言願聖明主永永萬斯年

三婦艷詩

大婦織綺羅中婦織流黃小婦獨無事挾瑟上高堂
人且安坐調弦詎未央

青青河畔草

容容寒煙起翹翹望行子行子殊未歸寤寐君

一作若

容

輝夜中心愛促覺後阻河曲河曲萬里餘情交襟袖疎
珠露春華返璿霜秋照

一作桂

晚入室怨蛾眉情歸為誰

婉

同沈右率諸公賦鼓吹曲二首

巫山高

諸公詩別見謝
沈二集此不載

想像

一作
髣髴

巫山高薄暮陽臺曲煙霞乍舒卷蘅芳自斷

續彼美如可期寤言紛在矚憮然坐相思秋風下庭綠

芳樹

相望早春日煙華雜如霧復此佳麗人含情結芳樹綺
羅已自憐暄風多有趣去來徘徊者佳人不可遇

臨高臺

遊人欲騁望積步上高臺井蓮當夏吐窓桂逐秋開花

飛低不入鳥散遠時來還看雲棟影含月共徘徊

望城行

金城十二重雲氣出表裏萬戶如不殊千門反相似
車馬若飛龍長衢無極已簫鼓相逢迎信哉佳城市

法樂辭十二首

天長命自短世促道悠悠禪衢閑遠駕愛海亂輕舟
累塵曾未極心樹豈能籌情埃何用洗正水有清流

右歌本起

百神肅以虔三靈震且越恒曜拚芳宵薰風動蘭月丹
榮藻玉墀翠羽文珠闕皓毳非虛來交輪豈徒發

右歌靈瑞

韶年春已仲明星夜未央千祀鍾休歷萬國會嘉祥金
容涵夕景翠鬢佩晨光表塵維淨覺汎俗迺輪皇

右歌下生

襲氣變離宮重柝驚層殿曼響感心神修容轉懽宴生
老終已縈死病行當薦方為淨國遊豈結危城戀

右歌在宮

春枝多病天秋葉少欣榮心骸終委滅親愛暫平生
長風吹北隴迅瀑急東瀛知三既情暢得一乃身貞

右歌四遊

飛策辭國門端儀偃郊樹慈愛徒相思閨中空戀慕
夙隸乖往塗駿足獨歸路舉袂謝時人得道且還去

一作顧

右歌出國

明心弘十力寂慮安四禪青禽承逸軌文驪

一作鑣

鏡重

川驚巖標遠勝鹿野究清玄不有希世寶何以導濛泉

右歌得道

亭亭雙月流朏朏晨霜結川上不徘徊條間亟渝滅靈
知湛常然符應有盈缺感運復來儀且厭人間世

音泄

右歌雙樹

春山玉所府檀林芳所棲引火歸炎燧挹水自清隄菴
園無異轍祇館有同躋比肩非今古接武豈燕齊

右歌賢衆

昔余輕歲月茲也重光陰
閨中屏鉛黛闕下挂纓簪
禪悅兼芳旨法言戀一作忘清琴一異非能辨寵辱誰為心

右歌學徒

峻宇臨層穹峇峇疎遠風
騰芳清漢裏響梵高雲中
金華紛苒若瓊樹鬱青蔥
貞心延淨境遽業嗣天宮

右歌供具

影響未嘗隔晦明殊復親
弘慈邈已遠睿后扇高塵
區中提景福寓外沐深仁
萬祀留國祚億兆慶唐民

右歌福應

少年子

聞有東方騎遙見上頭人待君送客返桂釵當自陳

江臯曲

林斷山更續洲盡江復開雲峯帝鄉起水源桐柏來

思公子

春盡風颯颯蘭凋木修修王孫久為客思君徒自憂

王孫遊

玉臺作
春遊

置酒登廣殿開襟望所思春草行已歇何事久佳期

陽翟新聲

隋書翟作澤

懷春發下蔡含笑向陽城恥為飛雉曲好作鷄鳴

永明樂十首

玄符昭景厯茂實偶英聲長為南山固永與朝日明
靈丘比翼棲芳林合條起兩代分憲章一朝會書軌
二難金玉相三衣蘭蕙芳重儀文世子再奉東平王
空谷返逸驂陰山響鳴鶴振玉躡丹墀懷芳步青閣

崇文晦已明膠庠雜復整弱臺留折中沂川詠芳穎
定林去喧俗鹿野出埃霞香風流梵瑄澤雨散雲花
楚望傾澠滌日館仰鑒鈴已晞五雲發方照兩河清
幸哉明盛世壯矣帝王居高門夜不析飲帳曉長舒
總棹金陵渚方駕玉山阿輕露炫珠翠初風搖綺羅
西園抽蕙草北沼掇芳蓮逢永明樂死日生之年

奉和秋夜長

玉臺作
秋夜

秋夜長夜長樂未央舞袖拂花燭歌聲繞鳳梁

代五雜組

五雜組慶雲發往復還經天月不獲已生胡越

奉和兩頭織織曲

兩頭織織綺上紋半白半黑鷓鴣翔羣鴝鵒膊膊烏迷瞋
磊磊落落玉石分

詩

贈族叔衛軍

台曜澄華鉉岳裁峻經天為象麗地作鎮不器其德有

斐斯文質超瑚璉才逸卿雲搖筆泉瀉動詠靈紛德聲
伊何如蘭之宣貞筠抽箭潤璧懷山六樂畢該五禮備
貫七訓是數三英有聚惟旦惟公惟公惟公

從武帝琅琊城講武應詔

治兵聞魯策訓旅見周篇教民良不棄任智理恒全
白日映丹羽頽霞文翠旃凌山炫組甲帶水被戈船凝葭
鬱摧愴清管乍聯綿早逢文化洽復屬武功宣願陪玉
鑒右一舉掃燕然

棲玄寺聽講畢遊邱園七韻應司徒教

道勝業茲遠心閒地能隙桂檫鬱初栽蘭墀坦將闕虛
檐對長嶼高軒臨廣液芳草列成行嘉樹紛如積流風
轉還逕清煙泛喬石日汨山照紅松映水華碧暢哉人
外賞遲遲眷西夕

雜體報范通直

和璧荆山下隋珠漢水濱無雙自昔代有美今為隣三
楚多秀士江上復才人緯蕭非善賈聖德可名臣追飛

且學步共子奉清塵紫庭風日好青槐枝葉新徘徊吹樓側欲見心所親
別君蘭蕙草何用以書紳

別蕭諮議

徘徊將所愛惜別在河梁衿袖三春隔江山千里長寸心無遠近邊地有風霜
勉哉勤歲暮敬矣事

玉臺作慎

容光

山中殊未憚杜若空自芳

寒晚敬和何徵君點

疎酌候冬序閒琴改秋律如何將暮天復值西歸日搖

落迎軒牖飛鳴亂繩草煙灌共深陰風篴兩蕭瑟虛堂
無笑語懷君首如疾早輕北山賦晚愛東臯逸上德可
潤身下澤有徐轡

叶音必

和王友德元古意二首

遊禽暮知返行人獨未歸坐銷芳草氣空度明月輝
容入朝鏡思淚點春衣巫山彩雲沒淇上綠楊稀待君
竟不至秋鴈雙雙飛

霜氣下盟津秋風度函谷念君淒以寒當軒卷羅縠纖

手廢裁縫曲鬢罷膏沐千里不相聞寸心鬱紛蘊

平聲

復飛螢夜木葉亂紛紛

奉和竟陵王郡縣名

追芳承荔浦揖道訊虛丘升裾臨廣牧從雲盡平洲曾
山臨翠坂方渠緬清流陽臺翻早茂陰館懷名秋歲宴
東光弭景仄西華收端溪慙昔彥測水謝前修往食曲
阜盛今屬平臺遊燕棠缺初雅鄭衮息遺謳久傾信都
美乃結茂陵傳河間誠可詠南海果難遊

遊仙詩五首

桃李不奢年桑榆多暮節常恐秋蓬根連翮因風雪習
道遍槐岷追仙度瑤碣綠帙啟真詞丹經流妙說長河
且已縈曾山方可礪

叶音列

獻歲和風起日出東南隅鳳矜亂煙道龍駕溢雲區結
實自員嶠移讌乃方壺金危浮水翠玉輦挹泉珠徒用
霜露改終然天地俱

命駕瑤池隈過息羸女臺長袖何靡靡簫管清且哀璧

門涼月舉珠殿秋風迴青鳥驚高羽王母停玉杯舉手
暫為別千年將復來

湘沅有蘭芷曰吾欲南征遺珮出長浦舉袂望增城朱
霞拂綺樹白雲照金楹五芝多秀色八桂常冬榮弭節
且夷與參差聞鳳笙

命駕隨所即燭龍導輕鑣沙澤振寒草弱水駕冰潮遠
翔馳聲響流雪自飄飆忽與若士遇長舉入雲霄羅繹
徒有睨蜺螭已寥寥

春遊迴文詩

枝分柳塞北葉暗榆關東垂條逐絮轉落盡散花叢池
蓮照曉月慢錦拂朝風低吹雜綸羽薄粉艷粧紅離情
隔遠道歎結深閨中

侍遊方山應詔

巡躅望登年帳飲臨秋縣日羽鏡霜淥雲旗落風甸四
瀛良在目八寓宛如見小臣竊自嘉預奉柏梁讌

奉辭鎮西應教

未學謝能美高義幸知遊雷庭參辨夷梁苑豫才鄒徘徊歲光晚搖落江樹秋風旗紫別浦霜瑣迢遙洲

餞謝文學離夜

所知共歌笑誰忍別笑歌離軒思黃鳥分渚夢青莎翻情結遠旆灑淚與行波春江夜明月還望情如何

和南海王殿下詠秋胡妻七首

日月共為照松筠俱以貞佩紛甘自遠結鏡待君明且協金蘭好方愉琴瑟情佳人忽千里幽閨積思生

景落中軒坐悠悠望城闕高樹升夕煙層樓滿初月光
陰非或異山川屢難越輟泣拚鉛姿搔首亂雲髮

傾魄屬徂火搖念待方秋涼氣承宇結明熠僚堦流三
星亦虛映四屋慘多愁思君如萱草一見乃忘憂

杼軸鬱不諧契濶彌新故朔風欄上發寒鳥林間度客
遠乏衣裘歲晏饒霜露參差興別緒依遲起離慕

願言如可信行邁亦云反睇景不告勞瞻途寧遽遠何
以淹歸轍蠶妾事春晚送目亂前華馳心迷舊婉

椒珮容有結振芳跂路隅黃金徒以賦白珪終不渝明
心良自皎安用久踟躕遡車反粉巷流日下西虞

披帷悵有望出門遲所欲彼美復來儀慙顏變欣矚蘭
艾隔芳臭涇渭分清濁去去夫人子請殉川之曲

琵琶

同賦諸
公別見

抱月如可明懷風殊復清絲中傳意緒花裏寄春情掩
抑有奇態悽鏘多好聲芳袖幸時拂龍門空自生

詠幔

古大苑
作謝朓

幸得與珠綴，羃羃君之楹。月映不辭卷，風來輒自輕。每聚金鑪氣，時駐玉琴聲。但願置尊酒，蘭缸當夜明。

藥名

重臺信嚴敞，陵澤乃閒荒。石蠶終未蠶，垣衣不可裳。秦芎留近詠，楚蘅搢遠翔。韓原結神草，隨庭銜夜光。

星名

眇歎屬辰移，端憂臨歲久。慙入漢客每，愧遵河影仙。羽誠不退蓬，襟良未整誰。謂無正心大，陵有霜穎。

奉和月下

雕雲度綺錢香風入珠網獨知此夜月依遲慕神賞

詠池上梨花

翻堦沒細草集水間疎萍芳春照流雪深夕映繁星

詠梧桐

鸞鳳影層枝輕虹鏡展綠豈數龍門幽直慕瑤池曲

詠女蘿

幕慙女蘿草蔓衍旁松枝含煙黃且綠因風卷復垂

移席琴室應司徒教

雪崖似留月羅徑若披雲潺湲石溜寫綿巒山雨聞

抄衆書應司徒教

說禮固多才惇詩信為善巖竒發仙華金滕開碧篆

自君之出矣

自君之出矣芳蕕絕瑤卮思君如形影寢興未曾離

自君之出矣金鑪香不然思君如明燭中宵空自煎

擬古二首

花帶今何在亦是林下生何當垂雙髻團扇雲間明
鏡臺今何在寸身正相隨何當碎聯玉雲上壁已虧

四色詠

赤如城霞起青如松霧澈黑如幽都雲白如瑤池雪

離合賦物為詠

冰容慙遠鑒水質謝明暉是照相思夕早望行人歸

火

雙聲詩

園蘅眩紅蘼湖荇燁黃華迴鶴橫淮翰遠越合雲霞

聯句

阻雪連句遙贈和

積雪皓陰池北風鳴細枝九達密如繡何異遠別離

謝朓

風庭舞流霰冰沼結文澌飲春雖以煥欽賢紛若馳

江秀

才革珠霽條間響玉溜檐下垂杯酒不相接寸心良共知

王丞融飛雲亂無緒結冰明曲池雖乖促席讌白首信勿

虧王蘭陵僧孺飄素瑩簷溜巖結噎通歧樽罍如未澣況乃

限音儀

謝洗馬吳

原隰望徙倚松筠竟不移隱憂慙萱樹忘


懷待山巖

劉中書繪

初昕逸翮舉日昃駑馬疲幽山有桂樹

歲暮方參差

沈右率約



漢魏六朝百三家集卷七十六